



客語能力認證考試

102 年頭尾回个客語能力認證考試考了。今年个客語能力認證有真大个無共款。起頭係對讀幼稚園个細子辦个第二回「幼幼客語闖通關」，用圖得細子認出遐係麼个物件，抑係麼个人、麼个款个色地、討去哪位寮、坐麼个款个車。攞來得這兜細子用比、用講个來回答。用這兜普通時會用著个事，教這兜細子，考法實在真活，會用考出細子个現場反應。教細子講生活个事，隨學隨用會著，係活个，毋係死背。所以「幼幼客語闖通關」个考法，實在係想了真好勢。

另外今年个初級認證有真大个改變。係加題目先做好題庫，進前錄音錄便。討考个時，用電腦抽題目。直接在電腦面上回答，毋使出題个先生攞入圍出題，係真大無共款。毋過無定著係第一回辦，真多人毋會適應，考了嘎無幾好。落尾想想，用電腦考試，僂人即無法度像用紙本寫个返轉頭去睇題目，抑係加一兜時間去想，愛隨回答。一兜反應較慢个人即無法度考好。

接落來係 12 月 29 日頭尾場个能力認證——「102 年度客語能力認證中級暨中高級考試」，聽考出來个考生講，一年比一年難。大家即笑笑在講，因為頭年辦無經驗，毋知題目愛出幾深，驚過頭難，考倒大家。攞來有經驗啊，嘛知大家程度，所以對成過毋罇个部分補過來，成過想無著、考無著个攞提出來考。嘛證明大家這幾下年來客事个能力有真大个進步。

尤其有一兜先生為著鼓勵學生來學客事，下真重本。若通過認證即有獎金。實在得人真感心。特別係這兜教客事个鄉土語言先生，佢人普通時毋單單係教書定。猶愛訓練學生參加客事朗讀、演講比賽。甚至係唱歌、做戲、弄布袋戲，會用講係功夫盡展。學生參加客事能力認證，毋單單係考學生，嘛係印證先生普通時个認真和打拚、用心。希望僂人大家學客事會用自小、自屋下底來學，加自家个母語一直傳承落去。

作者：李秉璋

☆詞彙學習☆

- | | |
|------------------------------|----------------------------|
| 【頭尾】teu` muiˇ：最後。例：頭尾名，最後一名。 | 【錄便】liu pien：事先錄音錄好了。 |
| 【起頭】ki` teu`：剛開始、起初、開頭。 | 【返轉頭】fan` zhen` teu`：回頭。 |
| 【色地】sed` ti：顏色。 | 【毋罇】m la：不夠、不足。 |
| 【活】ua：此處作「靈活」使用。 | 【重本】chung` bun`：重金，高金額的獎勵。 |
| 【隨】sui`：立刻、馬上。 | 【感心】gam` simˇ：令人感動又佩服。 |

☆文法學習☆

- 【得】ded`：1. 給予；2. 讓、被。
- 例 1：阿怙昨日買一本書得佢。（爸爸昨天買一本書給我。）
- 例 2：寒著即愛去得先生睇，毋會用自家買藥食。（感冒就要去看醫生，不可以自己買藥吃。）